

**Pertumbuhan ekonomi Malaysia pada kadar tinggi 5.0 peratus tahun ini -
Manulife IM
Astro Awani
24 Julai 2024
Bernama**

KUALA LUMPUR: Pertumbuhan ekonomi Malaysia dijangka berada pada tahap tinggi sebanyak 5.0 peratus, didorong oleh beberapa inisiatif kerajaan selain sejajar dengan trajektori pertumbuhan negara ASEAN yang lain, kata Pengurusan Pelaburan Manulife (Manulife IM) hari ini.

Pengurus Kanan Portfolio Ekuiti, Marco Giubin berkata bagaimanapun, ia masih akan bergantung pada kadar inflasi untuk tahun ini.

"Kami tidak menjangka Malaysia, khususnya, akan mengurangkan kadar tahun ini. Kami berpendapat KDNK (Keluaran Dalam Negara Kasar Malaysia) akan berada dalam jajaran pertumbuhan 5.0 peratus yang tinggi... pada 5.8 peratus. Kami perlu tunggu dan lihat apa yang akan berlaku tahun depan," katanya semasa sesi soal jawab semasa taklimat media maya mengenai prospek pasaran serantau bagi pertengahan 2024 semalam.

Pada penghujung Jun lepas, Menteri Ekonomi Rafizi Ramli berkata inisiatif untuk merasionalisasikan subsidi bahan api dijangka memberi kesan kepada kadar inflasi negara tetapi pelaksanaan melalui strategi yang dirumus dengan baik, ditambah dengan bantuan tunai bersasar, akan membantu mengurangkan impak ini.

Beliau menjelaskan kerajaan terus memberi subsidi dan menetapkan harga diesel pada RM2.15 seliter untuk 23 jenis kenderaan logistik di bawah Sistem Kawalan Diesel Bersubsidi (SKDS) 2.0, sambil mengekalkan harga diesel pada RM1.88 bagi bas sekolah, bas ekspres, ambulans dan jentera bomba.

Kadar inflasi Malaysia menokok kepada 2.0 peratus pada Mei berbanding kenaikan 1.8 peratus pada April, didorong oleh peningkatan harga dalam kumpulan utama yang merangkumi perumahan, air, elektrik, gas dan bahan api lain sebanyak 3.2 peratus serta tambahan 3.2 peratus lagi dalam perkhidmatan restoran dan penginapan.

Walaupun inflasi masih terkawal di Asia, cabaran yang berterusan daripada kadar faedah Amerika Syarikat (AS) yang lebih tinggi telah mengekang penggunaan dan pelaburan dalam ekonomi Asia.

Giubin berkata cabaran yang semakin mengendur, digabungkan dengan trend semakin pendapatan Asia yang semakin mantap, tidak termasuk Jepun dan penilaian yang menarik boleh memangkinkan potensi penarafan semula dalam ekuiti Asia.

"Pada penilaian kami, dalam ASEAN, kami lebih fokus ke arah Filipina dan kami fikir Filipina akan menjadi salah satu penerima manfaat terbesar jika terdapat pemotongan kadar," tambahnya.

Pasaran Indonesia dan Thailand turut menarik minat Manulife IM.

"Indonesia sentiasa menjadi tumpuan kami dalam pasaran ASEAN. Dalam jangka pendek, saya fikir kami perlu memerhatikan Indonesia, pada beberapa trajektori pendapatan.

"Perlu ada pendekatan tunggu dan lihat untuk menyaksikan bagaimana peralihan berlaku daripada kerajaan sebelum ini kepada (Presiden dipilih) Prabowo Subianto dan melihat bagaimana ia akan berlaku tetapi saya rasa akhirnya Indonesia tetap berpotensi menjadi pasaran yang menarik," katanya lagi.

Sementara itu, hasil daripada kitaran pengetatan yang agresif pada 2023, Manulife IM kini menjangkakan peralihan penting dalam landskap ekonomi global dengan menjelaskan bahawa kadar faedah AS berkemungkinan memuncak dan menjangkakan Rizab Persekutuan AS (Fed) akan menyertai kitaran pelonggaran global pada penghujung tahun ini.

Ketua Peruntukan Aset, Luke Browne berkata ekonomi seperti Eropah, Jepun dan China telah menunjukkan tanda-tanda penstabilan serta peningkatan, dengan penggubal dasar terpaksa campur tangan bagi menyokong sektor bermasalah seperti pasaran hartanah di China.

"Kecepatan disinflasi global, khususnya di AS, akan menjadi tumpuan kami untuk baki tahun ini. Sejak beberapa bulan lepas, bank-bank pusat di negara maju seperti Switzerland, Kanada dan baru-baru ini Bank Pusat Eropah telah mengurangkan kadar.

"Bagaimanapun, Fed AS lebih berhati-hati kerana faktor inflasi yang berterusan seperti insurans kereta dan kos perlindungan, telah menyebabkan disinflasi berkembang secara tidak sekata," katanya.

Browne berkata memandangkan ke hadapan, Manulife IM percaya faktor-faktor penyebab inflasi yang bersifat sementara ini akan menstabil, membolehkan Fed mengurangkan kadar faedah menjelang akhir tahun ini.

-- BERNAMA

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-bisnes/pertumbuhan-ekonomi-malaysia-pada-kadar-tinggi-50-peratus-tahun-ini-manulife-im-480307>